

# *NZIRA YAKAPIHWA*

## *NAMWARI YEZUVA RINO*

 . . . kwekanguva takakotamisa misoro yedu.

Baba vedu veKudenga, tinoKutendai naJesu Kristu, vimbiso dzaKe huru dzaAkapa kwatiri. TinoKutendai nezvose zvinhu izvi. Tiri pasi pekutarisira kukuru pano muguta rino pakati peMakristu aya akanaka. Tiri kutarisira kuMuona achifamba pakati pedu achiratidza hupo hwaKe, achipa vanhu kutenda, nekuvafemera kutenda. Ndicho chikonzero chedu chokuva pano, Baba. Tinoziva kuti tinogona kuvimba neMi. Hatzizoodzwa moyo. Nokuti tazvikumbira nemuZita raKe. Ameni.

Mungagare henyu pasi.

Ndafara chaizvo mangwanani ano kuva nekudyva kwamangwanani uku neboka iri rakanaka revashumiri pano muguta. Uye saka isu...Ndinofunga kuti ha—hama vaitepa kana paine munhu angaida. Nguva yekuyanana yakadii yatava nayo. Uye zvino, husiku huno ndihwo husiku hwedu hwepiri, tichienderera mberi nenzira. Saka zvino, tinovimba kuti Ishe vachakuropafadzai mose zvakanyanyisa kwazvo.

Ndinotenda kuti ndakatarisa shamwari yangu yakanaka, Amai Upshaw, vagere pano, Hanzvadzi Upshaw. Ishe vakuropafadzei. Ndinorangerira Hama Willie Upshaw. Ndakawana tsamba kubva kumudzimai rimwe zuva nemufananidzo waHama Willie, nhengo yeParamende. Saka, va—vakange vakaremara kwemakore makumi matanhatus nematanhatu.

Ndaiva mumusangano humwe husiku, ndikaona chiratidzo chavo, vakagara, vachifamba pamusoro peungano, vaine sutu yavo, vakakotama pasi. Vakanga vari muhwiricheya nemadondoro, sekuvaziva kwamaivaita mose, zvino Ishe Jesu vakavapodza husiku humwe chetehwo. Uye vakanga vaine kutenda kusvikira vashaya.

Tinonzwa kuremekedzwa, husiku huno, nekuda kwechirikadzi yavo yakagara pano. Vaiva nemakore mangani pavakaenda kunova naShe? Vaiva nemakore mangani? [Hanzvadzi Upshaw vanopindura—Mupepeti] Vakararama kusvika makore makumi masere nematanhatu ekuberekwa. [Hanzvadzi Upshaw vanopupura nezvekushayika kwavo.] Vakaenda Kudenga kunova na... Tinotenda nekuda kwevarume vakuru, mhare huru dzokutenda.

Zvino, husiku huno, ndezvekuti, hatidi kukuchengetai kwenguva refu. Takakuchengetai nemaminitsi aipfuura gumi manheru apfuura, maminitsi makumi maviri okusvika paawa yegumi. Kazhinji tinenge tabuda nanine-thirty. Ndichaedza kuzvigadzirisa izvozvo husiku huno. Ndakanga... Ndakachinja kubva pamharidzo dzangu dzechiporofita dzandainge ndichiparidza kwese-kwese munzvimbos dzakasiyana-siyana dzenyika, kushumiro dzekuvhangera zvakare. Uye pamharidzo dzechiporofita idzi, tinongoramba tichingoenderera. Uye kudzigurira pakati, zvinoita sekuoma, uye zvinoshandura shu-shumiro zvachose.

Zvino chikonzero ndiri kuita izvi: nekuti rimwe zuva, ndaiuya zasi ndichibva kuCanada, nechepamusoro pano muMontana, rumwe rungwanani-ngwananani, Ishe Jesu... ndinoziva kuti zvinoita sezvisinganzwisisiki, asi ndaityaira ndiri mumotokari, zvino chimwe chinhu chakakwezva meso angu. Ndakanzwa Izwi, rakanyatsojeka semanzwiro amuri kuita rangu, rakati, "Zita rako rakanyorwa pagomo iro." Zvino ndakatarisa, uye patakamira, ini naBilly, Ishe Jesu vakati, "Dzokera zvino, utange kupinda mukuvhangera sezvawaisimboita."

Ndosaka ndiri pano husiku huno, nekuti ndiri kudzokera zvakare kunonamatira vanorwara. Pane nyaya refu kwairi, uye ndine chokwadi kuti imi vanhu vamatepi vari pano, vanoterera matepi edu, munoziva pamusoro penyaya yacho. Ndiri pano kunamatira vanorwara zvakare. Mune zvipo zvakawanda zvikuru muna Mwari. Mwari vanogona kushandisa chero chazvo chaVanoda kana tikangoVarega vachiita sekudaro. Ndivo Ishe Mwari.

Uye zvino, ndiri kuedza kurega... kuti ndisaisa maoko pamusoro pevanhu kana ndikakwanisa kusazviita, nekuti, ipapo, zvinoita sekunge (zvakanaka), asi zvinoita sekunge mumwe munhu, akapodzwa, vanoti, "Saka, *Nhingi-nhingi* vakaisa maoko avo pamusoro pangu." Maona? Ndi—ndinoda kukuonai muchingoisa maoko paAri, pana Kristu.

Chinangwa changu ndecekuti, tinoziva tose neMagwaro, kuti kupodza kwaMwari kwakagara kwakachengeterwa mutendi wose. Icho chikamu—icho chikamu chekutambudzika kwajesu: "Akakuvadzwa nekuda kwekudarika kwedu, nemavanga aKe takapodzwa. SaMosesi akasimudza nyoka yendarira murenje, naizvozvo Mwanakomana wemunhu anofanira kusimudzwa." Chikonzero chimwe chete.

Zvino ndiwo waiva mumvuri, Kristu ndiye aimiririrwa. Uyeze kana—kana yananiso yakare yaikwanisa kuburitsa kupodzwa, ko kuzoti itsva, iyo ine zvinhu zviri nani, inoburitsa kupodza kwaMwari.

Zvino, Jesu akasimudzwa nechinangwa chimwe chete chakasimudzirwa nyoka yendarira (Akaitwa chivi): nekuti, nyoka yaive yakagadzirwa nendarira, zvino *ndarira* “muccherechedzo wekutonga kwedenga”; *nenyoka*, kuratidza “kutukwa kwenyoka” kubva mubindu reEdheni, uko kwakapinda nako chivi nehurwere.

Zvino Jesu haakwanise... Hakuna munhu anogona kuparidza Jesu Kristu seyananiso asina kuparidza kupodza kwaMwari. Hakuna munhu anokwanisa kuparidza Vhangeri asingaparidze kupodza kwaMwari. Nekuti, maona, haugone... angadai ane... haufanirwe kuva uine zvime zvinhu. Semhuka kana yakubata, haufanire kudimbura gumbo rayo, kana kudimbura ruoko rwa—rwayo kana chimwe chinhu chainacho pauri. Ingoiuraya kubva kumusoro wayo zvino unobva waibata.

Zvino ndiyo nzira iyo Jesu akaita apo paAka—paAkafira chivi: Akauraya zvose izvo zvakaitwa nechivi, Akatidzikinura zvizere. Tiri kutora zvino mu—muhoru kubva mune yedu huru... mari yerubatso rwekidzikinurwa kwedu kuzere pakuuva kwaKe zvakare.

Saka, munona, hurwere chaizvo-izvo hu—hunokonzerwa nechivi. Mumwe munhu akatadza. Kwakanga kusina hurwere kusvika chivi chauya. Uye zvakare chivi pachakapinda, hurwere hwakachitevera. Hurwere chiberekoo chechivi. Uyezve, paAkauraya chivi, zvakatora zviberekoo zvose pamwe nacho. Maona, zvaifanira kudaro.

Zvino, tichaverenga husiku huno chikamu cheGwaro.

Ndinofara kwazvo kunge ndine, kumashure kwangu pano husiku huno, boka rakanaka rehama dzanga dziri mumusangano mangwanani ano, uye kuwana, kuona Hama Shakarian kumashure ikokowo, zvakare, neshamwari dzangu zhinji, nevamwezve vavo. Ndinofara chaizvo kuva nemi pano hama husiku huno. Ndinamatireiwo zvino, kana mukaita sekudaro.

Zvino, ngatipindei muGwaro, kwechidzidzo chidiki, Ishe vachitendera.

<sup>2</sup> Uye rangarirai, mangwana husiku, tichamatira vanorwara zvakare. Uye zvino pandinenge ndiri kutaura... Tererai, munhu wese edza kuita izvi, usamirire kuti chimwe chinhu chitiike. Chinhu chaunofanira kuita, kutenda Mwari iko zvino. Tendai Iye iko zvino! Maona?

<sup>3</sup> Zvino kwakava nemhando dzose dzeshumiro. Mwari, mumazuva ano ekupedzisira, ndinotenda, vakatipa zvose zvaVanazvo muBhuku raVo. Zvose zvaAkavimbisa, tazviona, uye nazvino zvinoita sekunge vanhu havasi kukwanisa kuzvibata. Avo vakatemerwa kuzvibata, vanozvibata; ivavo chete. Zvinopofomadza mumwe; zvovhura meso emumwe.

<sup>4</sup> Rangarirai, tinotenda kuti Jesu Kristu mumwe chete zuro, nhasi, nekusingaperi. Haana kufa, asi mupenu nekusingaperi. Uye Ari pano husiku huno. Tiri muHupo hwaKe, husiku huno, uye Ari pano kusimbisa nekuzadzisa chero vimbiso yaAkaita yezuva rino. Uye Ndiye mumwe chete zuro, nhasi, nekusingaperi. Saka, chinhu chipi chaAiva, ndizvo zvaAri, husiku huno. Saka ngatiMutendei zvino, patiri kuverenga Shoko raKe nekutaura pamusoro paKe, kwemaminitsi gumi nemashanu, kana makumi maviri anotevera.

<sup>5</sup> Genesi, chitsauko 22, uye ndima 7 ne 8, senzira yekuwana nayo chidzidzo.

*Zvino Isaka akataura naAbrahama baba vake, akati, Baba vangu: iye akati, Ndiri pano hangu, mwanakomana wangu. Zvino akati, Hoyu moto nehuni: asi gwayana rechibairo chinopiswa riripiko?*

*Abrahama akati, Mwanakomana wangu, Mwari uchapa amene gwayana rechibairo chinopiswa: saizzozvo vakafamba vari vaviri.*

<sup>6</sup> Ishe Jesu, ropafadzai Shoko reNyru, ngaRirege kudzokera risina zvaraita, asi mbeu ngadzidonhere pavhu dzichaunza ruponeso kune avo vane zvavari kushaiwa, zvose panyama nepamweya. Tinozvikumikidza kwaMuri; ungano, vateereri, Shoko, chidzidzo, nechirevo chacho. Mweya Mutsvene ngautore munhu watiri, kuti tione Jesu Kristu. Ameni.

<sup>7</sup> Ndinoda kutaura kwemaminitsi mashoma anotevera zvino pamusoro pekuti: *Nzira Yakapihwa NaMwari Yezuva Rino.*

<sup>8</sup> Mwari nguva dzose vakagara vaine nzira. Pane nzira mbiri, dzinova, nzira dzedu kana nzira dzaVo. Mwari vane nzira yanhasi, nekuti Vakagara vakagadzira nzira yezvinhu zvose. Mwari, kumavambo, vakaziva magumo, saka Vakaisa Gwaro raVo kuitira zera roga-roga. Zvino kana zera iroro, parinouya... Zvino musatadze kuona izvi. Zera iroro, parinouya pacho, kazhinji shumiro inenge yakavhenganiswa muzvitendwa, nezvimwe zvakadaro, uye netsika, kusvika zvava mamaera miriyoni kubva paShoko.

<sup>9</sup> Zvino zvakare Mwari vanogara vachituma mumwe munhu panzvimbo, muporofita. Zvino muporofita uyu... Mwari havashanduri maitiro aVo. Havashanduri nzira dzaVo. Vanogara vachizviita nenzira imwe chete. Vakagara vachidaro; Vanofanira kuzviita nguva ino. Uye, kuburikidza neizvi, Mwari vanoshanda nekusimbisa Shoko iroro. Sekutura nemi kwandakaita husiku hwapfuura, Mwari vachiita dudziro yaVo yoga. Mwari havadi munhu anodudzira Shoko kwaVari. VanoRidudzira pachaVo, nekuRisimbisa, vachiRiita ramazvirokwazvo. Uye kana Mwari vakataura kuti Vachaita chimwe chinhu, zvino Vochiita, hakuchinazve mubvunzo pachiri. Ndiyo nzira yaVanoZviita nayo.

<sup>10</sup> Saka Mwari vakatigadzirira nzira. Mwari vanoda vana vaVo. Vanoda vanhu vaVo. Vanoda kuvabatsira. Vanoda kukubatsira kupfuirira madiro aungada rubatsiro. Kana ukangozviisa izvozvo mumoyo mako, kuti Mwari vanotonyanya kuda kukubatsira kupfuura zvaungazvibatsire pachako. Asi Vane nzira, uye ndiyo nzira yoga yaVanoshanda nayo kuburikidza nenzira yaVo. Unofanira kuuya maringe nemadiro aVo, kwete zvido zvako. Zvido zvaVo! Unozvida neimwe nzira, asi Va—Vanokupa nenzira yaVo.

<sup>11</sup> SaNamani achizvinyudza mumvu—mvu—mvura dzemuJorodhani. Saka, akati mvura dziri kumusoro munyika make dzakanyanya kuchena uye dziri nani, asi handizvo zvakanga zvataurwa nemuporofita. “Zvinyudze apa.” Akazvinyudza kamwe, maperembudzi achingovapo; katanhatu, akanga achingovapo. Aitofanirwa kuterera nekuuya nenzira yaMwari. Zvino paAkaterera zvakazara nzira yaMwari, maperembudzi akabva aenda.

<sup>12</sup> Uye ndinoti, husiku huno, kana tikaterera nzira yakapihwa naMwari, maperembudzi anoenda, hurwere hunoenda, zvose zvinoenda, asi tinofanirwa kuuya nenzira yaVo yezuva rino. Zvino, kuzvinyudza muJorodhani hakuna zvakunobatsira zvino; zvaiva zvaNamani. Murairo waiva wema—wemaJudha. Nyasha kuburikidza naKristu.

<sup>13</sup> Asi zera roga-roga rine chikamu charo cheVhangeri chakafanotaurwa kare. Bhaibheri rino ndiro chizaruro chakazara chaJesu Kristu. Hakuna zvimwe zvinogona kuwedzerwa kwaRiri, kana chimwe chinhu chinobviswa paRiri; munhu anozviita akatukwa. Hatikwanisi kuwedzera chimwe chinhu kwaRiri, kubvisa chimwe chinhu kubva kwaRiri. Tinofanira kutarisa Muno toona zvakavimbisirwa zera rino, uyezve tozviona zvichiitika. NdiMwari vachidudzira Shoko raVo Yoga. Parakati, “Mhandara ichabata mimba,” yakabata pamuviri. Ndiko kududzira kwaMwari kwaRiri. ZvaVanovimbisa, izvozvo ndizvo zvaVanoita.

<sup>14</sup> Zvino tinoona kuti Mwari havashanduri maitiro aVo ekuita nawo zvinhu. Vanogara vachizviita zvimwe chetezvo. Tinogara tichishanduka nekuti tine patinogumira. Tinoita mhando dzose dzekukanganisa, uye tinogona kuita zviri nani uye tova vari nani. Asi Mwari havana magumo. Sarudzo yaVo yokutanga yakakwana nguva dzose. HaVawedzeri pahuchenjeri. Vaiva vari...Ndivo chitibu chehuchenjeri hwose. Ndivo huchenjeri hwose. Ndivo simba rose, samasimba, vari kwese-kwese, vanoziva zvose, uye vasina magumo. Saka naizvozvo, paVanotaura chero chinhu, isa mweya wako paChiri, nekuti ndechechokwadi.

<sup>15</sup> Zvino mamwe machechi anoti, “Zvino isu hatitende *Izvi*, uye tinotenda *izvo*.” Mwari havambofa vakatonga nyi—nyika

kubudikidza nechechi. Vanoitonga naJesu Kristu, uye Jesu iShoko. Vachatonga chechi neShoko.

<sup>16</sup> Uye Kana *Ichi chiri* chizaruro chaJesu Kristu kumazera ose, uye nekuzera rino, Vanozarurwa muBhaibheri rino zvaVachaita muzera rino; zvino kana taRiona richizviita, kana tikaMuona achiita zvaAkavimbisa kuita. Kwete kuberekwa nemhandara; aiva makore zviiri zvakapfuura. Asi zvaVakavimbisa kuita nhasi, zvaVakati Vanoita nhasi, ndizvo zvaVari nhasi uno.

<sup>17</sup> Nguva zhinji, vanhu vanoti, “Saka, handitende *Izvo*.” Saka, wawana mududziri waEvha zvakare; anongotora chikamu chaRo, asi kwete iRo rose.

<sup>18</sup> Saka tinoda kurangarira kuti Mwari vanoramba vari vamwe chete. Shoko raVo, nezvaVanotaura, Vanozviita.

<sup>19</sup> Kuratidza kuti haVashanduki. Muna Genesi 1, Vakati, “Regai mbeu yose ibereke zverudzi rwayo. Regai mbeu yose ibereke zverudzi rwayo.” Uye ipapo, tinobva tarova chimwe chinhu ipapo chinokandira kunze avo vanotenda zvekushanduka kwerudzi rwechimwe chinhu. Haukwanisi kuita masanganiswa ezzimwe zvinhu. Unotora sebhiza ne—ne... nedho—dhongi, zvisanganise pamwe chete, unobuditsa nyurusu, asi nyurusu harikwanisi kuzvibereka nekubuditsa rimwe nyurusu. Rinobva ramirira ipapo. “Mbeu yoga-yoga ichibereka zvemhando yayo.” Vanogona kusanganisa mhuka, asi inozvishandura ichidzokera pamavambo zvakare, zvinoratidza kuti haishanduki kubva pane zvairi saizvozvo. Kwete, changamire. Inogumira ipapo. Unogona kusanganisa spinachi nechimwe chinhu, pamwe chete, wobuditsa keri, asi haukwanise kuiita kuti ibereke mhando yepakutanga zvakare. Kwete, changamire. Unogona kusanganisa chibage; asi ukadyara mwana wechibage chemasanganiswa chiya zvakare, hauna chaunowana. Unofanirwa kudzokorora kuchisanganisa nguva yoga-yoga. Nekuti, Mwari vakati, “Mbeu yose ngaibereke zverudzi rwayo.”

<sup>20</sup> Uye zvino, nekusanganisa zvinhu, tarisai zvapindana nenyika nhasi. Ndaiverenga chinyorwa pano, kubva muReader's Digest, apo, “Makore makumi maviri kubva zvino, vakadzi havazokwanisa kuita vana, kana zvikaramba zvichidaro. Vari kudya chikafu chemasanganiswa.” Zvazviri ndezvezkuti, vakachisanganisa, uye handiyo nzira iyo yakagadzirirwa nayo munhu, kudya mhando yechikafu chakadaro. Chakagadzirirwa kuti chiwanikwe chiri mune... kana kuti kuchidya nenzira yachakasikwa nayo. Ndicho chikonzero, nhasi, vasingagone kuchengeta nyama nezvimwe zvose nenzira yazviri, nemhaka yekuti masanganiswa, zvakadyarwa muvhru rinodziiswa, uye, oo, nenzira dzemhando dzose. Zvose zvakangovhenganiswa. Zvasvika pekuti rudzi rwose rwevanhu rwuri kuparadzwa nebudiriro dzavo pachavo, nekuedza kutora chimwe

chinhu chakagadzirwa naMwari zvakanaka, vochishandura nekuchigadzira kuva zvimbewo, nenzira yavo ivo. Zvisiye nenzira iyo Mwari akazvigadzira nayo!

<sup>21</sup> Zvasvika panzvimbo yavari kuedza kusanganisa machechi, nhasi; kubva parubhabhatidzo rwemazvirokwazvo rweMweya Mutsvene, kuve kukwazisana neruoko; imwe mhando yekusasa, kuzvifananidza nerubhabhatidzo rwemumvura. Oo, ini zvangu! Chinhu chose changova chemasanganiswa. Tinoda kudzokera.

<sup>22</sup> Chirimwa chemasanganiswa, unotofanira kuchichengetedza nekupfapfaidza mishonga, uye nekuchidzivirira kubva kune tumbuyu nezvipembenenene. Asi kwete chirimwa chechokwadi chine hutano; chakanyatsodzikama, chakasimba, hachina tumbuyu tunouya pachiri. Chine zvakakwana machiri kubvisa tumbuyu.

<sup>23</sup> Uye ndizvo zviri Mukristu wechokwadi! Hausungirwe kumubata sekacheche nekumubhabhadzira, uchimuudza *ichi, icho*, kana *chimwe*. Ane chimwe chinhu chiri maari, rubhabhatidzo rweMweya Mutsvene, rwunokandira zvime zvose kubva paari. Hauite wekugombedzera, nekuti iye chirimwa chechokwadi chaMwari. Ane chiri maari chinorwisa. Mukristu anorwira inchi imwe neimwe yenzvimbvo yaakamira pairi. Anofanira kuita izvozvo, kana achitarisira kurarama. Uye, nekudaro, pane Chinhu chiri maari chinomuchengetedza.

<sup>24</sup> Evha akaedza kusanganisa Shoko, kumavambo. Mwari vakamuudza, "Zuva rauchadya, ndiro zuva raunofa." Akaedza kuRisanganisa nezivo yaakapihwa naSatani. Uye paakadaro, akarasikirwa nerudzi rwose rwemunhu, ipapo, kuna dhiyabhore, paakaedza kusanganisa Shoko raMwari risina kusvibiswa nezivo. Hazvibvi pazivo yeShoko.

<sup>25</sup> Zvinouya nesimba reMweya Mutsvene! "Kwete nesimba, nemasimba, asi neMweya waNgu," ndizvo zvakataurwa naShe. Ndiwo maitiro anoitwa naMwari. Shoko raMwari imbeu yeHupenyu Husingaperi.

<sup>26</sup> Kana ukaedza kuRisanganisa, unoitei? Unozviuraya pachako naRo. Hazvishande. Harisangane sekusasangana kunoita mvura nemafuta zvakasanganiswa. Harizviiti.

<sup>27</sup> Havana kumbofa, nenzira yose, vakaedza kuwana chero chinhu chiri nani kupinda nzira yaMwari yekuzviita nayo. Munoziva, havasati wawana nzira, iri nani, yekuti huku iberekwe munyika muno, kunze kwekuviburitsa nekuchobora goko rezai nemuromo kuti ibude. Manga muchizviviza here? Havasati wawana nzira iri nani. Nhyio diki inoberekwa ine kapundu kadiki kwakaperera—kwakaperera muromo wako. Zvino muromo mudiki uyo wainayo, unofanira kushanda uchimara, nekumara-mara, kusvikira musoro wayo watanga, yatanga kubuditsa musoro wayo kunze, ichiboora-boora kusvikira yasununguka. Ndiyo nzira yakapiwa naMwari. Ukaidhonzera

kunze kwechikoko, zvinoiuraya. Hairarami kana ukaidhonza kubva muchikoko. Inofanira kuuya nenzira yaMwari.

<sup>28</sup> Ndiro dambudziko rine Makristu nhasi. Takavaita kuti varengenzeke, uye tikakwazisa maoko avo nekuvapinza zvepachivande, tikavajoinisa muchechi. Zavanoda iartari yekare yemunamato apo vanonamata zvizere, kusvikira vachizvishandisa pachavo, vanopinda nenzira yakapihwa naMwari, kusvikira vazvisunungura kubva kunyika. Dambudziko racho, nhasi, vanoisa zita ravo mubhuku vojolina chechi, zvino ndizvo zvoga zviripo. Asi nzira yaMwari, nzira yakapihwa, ndeyekugara ipapo uchishandira nzira yako zvachose, kusvikira Mwari vakupa Kuberekwa kutsva. Ndizvozvo chaizvo. Kumuburitsa, kunomuuraya.

<sup>29</sup> Ndiro dambudziko, nhasi, nevanhu. Kuberekwa patsva, vose vanokunzvenga. Havakude. Oo, vakatsivanisa chimwe chinhu neKuberekwa patsva, "huya kuno uye utende, zvino ndizvo zvoga zvaunofanira kuita." Dhiyabore anotenda, pachake, uye munoziva kuti haana kuberekwa patsva. Pane Kuberekwa patsva. Pane chimwe chinhu chinoenderana nako, chakaita sechisingakodzere, chisingagamuchirike kunyika.

<sup>30</sup> Chero kuberekwa kwese panoita uchapa. Handina basa kuti ndekupi. Mungava muri mudanga renguruve, kana—kana muchipatara. Kuberekwerwa kune uchapa.

<sup>31</sup> Ndizvo zviri Kuberekwa patsva! Kunokuitisa zvinhu zvawaisafungira kuti ungaitsa. Kunokuita kuti upfugame paartari uchichema, nekudanidzira, zvichibvisa pendi iri kumeso kwako, wosimudza maoko ako, uchirumbidza Mwari, nekutaura nendimi, nemhando dzose dzezvinhu. Kuberekwa patsva kunoita izvozvo nekuti ndiyo nzira yakapihwa naMwari yekuberekwa patsva.

<sup>32</sup> Unofanira kufa. Unofanira kufa usati waberekwa zvakare. Chero mbeu inofanira kufa isati yavandudzwa zvakare. Kunze kwekunge yafa, inogara yoga. Munhu anofanira kuti afe kumafungiro ake pachake. Anofanira kufa kumafungiro echinhu chose kunze kweShoko raMwari, ouya nenzira yaVo. Ndiyo nzvimbo yaMwari. Hatisangani naVo pamifungo yedu; tinosangana naVo pane zvaVakataura kuti tiite. Ndiyo nzira yakapihwa naMwari yacho. Vanhu vanoinzvenga; havaidi. Asi ndeyechokwadi, zvakadaro. Inodaro, inounza rufu, uye unofanira kufa, kufa kumafungiro ako.

<sup>33</sup> "Haiwa, ndinoziva kuti Bhaibheri rinozvitalura, asi handikwanisi kuzvinzwisisa." Saka chigara ipapo kusvika Mwari vazvizarura. Ndizvozvo. Žvinofanira...Ndiko Kuberekwa patsva.

<sup>34</sup> Madhadha nemasekwe, havana kumbobvira vawana nzira iri nani yekuti aende kuMawodzanyemba, kunze kwekutanga aungana pamwe chete. Uye ndizvozvo chaizvo. Unoona ose

achiuya pamwe chete uye anouya pachawo, kamwe kakufemera kanoakwezvera pamwe chete, uye anouya pamwe chete oungana pamwe chete asati abhururuka, asati aenda kuMawodzanyemba. Chii ichocco? Inguva yerumutsiriro, paanouya ose pamwe chete. Wakambonzwa here ruzha rwakadaro muhupenyu hwako, sekunzwa masekwe iwawo achiuya pamwe chete, kana madhadha iwawo? Handisati ndakambonzwa zvakadaro! Uye ane... Hakuna imwe, nzira iri nani yaangazviite nayo.

<sup>35</sup> Nguva dzakawanda, kumusoro kumasango ekuchamhembe, ndinotarisa matangiro ekutanga emamiriro ekunze anotonhora, muCanada. Boka remadhadha akaberekerwa ipapo padziva iroro, haana kubvira akabva padziva iroro, muchinda mudiki uyu haasati. Zvino chinhu chekutanga munoziva, mhepo inotonhora inouya ichidzika ichibva kuChamhembe. Dhadha diki iri, riri gono, rakangozvarwa riri mutungamiriri, rinoenda pakati pedziva iroro, rosimudza muromo waro mudenga, rorira kana kana kashanu, zvino dhadha rose riri padziva rinouya ikoko kwariri. Zvino rinosimuka kubva ipapo, roenda rakanyatsonanga kuLouisiana sokukwanisa kwaringaita richienda, kuminda yemupunga.

<sup>36</sup> Sei? Havana kumbobvira vawana imwe nzira iri nani yekuti risvike ikoko. Haukwanisi kuatinha pamwe chete. Woaisa mumupengo... chimwe chikwere, woatakurera nerori kuenda ikoko. Dhadha iroro rine pfungwa dziri nani kupfuura izvozvo. Zvino ukariisa muchikwere ichocco, kuti uriendese ikoko, rinobva raziva kuti rananga kunzvimbo inourairwa. Ndizvozvo chaizvo. Rinoenda nenzira yakapihwa naMwari.

<sup>37</sup> Ndiyo zvakare nzira iyo munhu anofanira kuita nhasi, kwete kungotinhirwa mukati nechimwe chikwere chemasangano. Asi pinda nenzira iyo Mwari vakati upinde nayo, kuburikidza nerubhabhatidzo rweMweya Mutsvene neKuberekwa patsva, rumutsiriro rwokuuya pamwe chete. Kwete zvokujoina chechi, kugomedzera uchibva pamusuwo uno uchienda pane mumwe, uye nekugovera mamagazini; asi Kuberekwa, kuberekwa patsva, kuzadzwa neMweya Mutsvene, nzira yaMwari, achizvisunungura kubva kunyika. Ndizvozvo! Kutenda Shoko raMwari! Nguva yakwana. Ndizvo zvatinofanira kutenda.

<sup>38</sup> Munhu, haukwanisi... Handina basa nekuti vanhu vangani vangaedza kuenda kudziva remadhadha iroro kumusoro ikoko voti, "Zvino chimbomirai kweminiti, imi madhadha madiki, tine chimwe chinhu chatinoda kutaura kwamuri. Tine dhadha rakadzidza riri pano. Rine Ph.D. nELL.D. Ndinokutaurirai kuti, rinokwanisa kukutungamirirai."

<sup>39</sup> Madhadha iwawo ane pfungwa iri nani kupfuura iyoyo. Hongu, changamire. Haana basa nedzidzo yaro iri nani, chero zvaingava. Anongoziva kamwe kamuririro karinoita.

Kufemerwa. Oo, ini zvangu! Chechi inofanirwa kuziva zvakadaro zveShoko raMwari!

<sup>40</sup> Nderumwe ruzha rwusinganzwisisike. Bhaibheri rakati, Pauro akati, "Kana hwamanda ikaita ruzha rwusinganzwisisike, ndiani angazvigadzirira kuenda kuhondo?" Ndizvozvo, kana chechi—kana chechi ikapa ruzha rwusinganzwisisike rwe "kujoina."

<sup>41</sup> Mwari vakati, "Kuberekwa!" Zvakamboitwa neKuberekwa ikoko, Kuberekwa kunoita zvimwe chetezvo nhasi, nekuti Jesu Kristu ndiyе mumwe chete zuro, nhasi, nekusingaperi. ZvaAiva kare, ndizvo zvaAri nhasi. Zvavaiita kare, ndizvo zvimwe chetezvo zvatinoita nhasi. Nzira yavakaKuwana nayo ikoko, ndiyo nzira imwe chete yavanoita nhasi. Chinhu chimwe chete chavainacho nhasi, ndicho chavaiva nacho kumashure uko. Kana Chiri chazouya, Chinouya nenzira iyoyo. Ndiyo nzira, nzira yakapihwa naMwari. Haizombofa yakashanduka.

<sup>42</sup> Madhadha haashanduki. Anonyatsoungana zvizere, gore roga-roga, oenda kuchamhembe, kumawodzanyemba, uye chero nzira yaanoenda nayo. Anotanga aungana.

<sup>43</sup> Ndiyo nzira inoitwa nayo naMwari. Vanotumira Shoko raVo mumwaka, mwaka iwovo, robva Raratidzwa. Zvino handina basa kuti zvimwe zvinhu zvingani zvinoitika; pavanoona Shoko raMwari rakavimbisa rezuba iroro, richisimbisa nekuvimbisa, hapana chinovamisa. "Mhandara ichabata mimba." Uye pavakati...

<sup>44</sup> "Jehovah Mwari wedu vachasimudza Muporofita akafanana nen," Mosesi akadaro.

<sup>45</sup> Zvino pavakaona Murume uyu auya achiita zvinhu zvaAkaita, vakaziva kuti aiva Mesiya. Zvino Firipi paakaona izvozvo zvaitwa, akati, "Ndimi Kristu. Ndimi Mambo weIsraeri." Akazviziva nekuti Shoko rakanga razvivimbisa, uye rairarama muzuva iroro. Zvisinei kuti vaFarise, nevaSadhusi vangani, vainege vakamira ipapo, Madhokotera eBhaibheri, hazvina kumumisa kana nepadiki pose, nekuti aitarisira chiratidzo ichocco. Paakachiona chichiitwa, ndicho chaise chiratidzo chenguva. Ndicho chavaitarisira, nzira yakapihwa naMwari. Hongu, changamire.

<sup>46</sup> Zvino hawaikwanisa kupa dhadha, dzidzo. Haraigona kuzviita. Haraiida. Mamwe madhadha ose aisaritevera, zvisinei kuti madhigirii mangani aringataura kuva nawo. "Zvino, tarisai kuno, ndakaenda kuchikoro chemadhadha. Ndinoziva zvose nezvazvo. Ndakapedza kudzidza. Ndinoziva zvinhu zvose izvi." Hazvina zvazvinobatsira. Hapana kana rimwe ramadhadha rinoritevera, kana ari madhadha chaiwo echokwadi, ameni, nekuti anotarisira chimwe chiratidzo. Kana aona chiratidzo ichocco, anochitenda.

<sup>47</sup> Zvino kana dhadha riine nzira yokuzviziva, ko kuzoti Mukristu akaberekwa patsva? Tinofanira kuziva Jesu Kristu musimba rekomuka kwaKe. Ndizvozvo. Mwari vanozviita nenzira yakapihwa naMwari.

<sup>48</sup> Rangarirai, dzidzo haizova chinhu chinovatungamirira kune nzvimbo yakapihwa naMwari. Chinhu chavainacho kufemerwa. Zvino iwo, madhadha iwawo, anoziva kuti kufemera ikoko kachaaendesa kunzvimbo yakapihwa naMwari.

<sup>49</sup> Saizvozvovo Mweya Mutsvene unoendesa Chechi kunzvimbo yakapihwa naMwari. Kwete kujoina chechi, asi kuzadzwu neHupo hwaKe, kuona Shoko raKe richiratidzwa, richisimbisa. Ndiyo nzira yakapihwa naMwari kuchechi, nguva dzose, kuitira vanhu, kuaunza kunzvimbo iyo Mwari vakapa kwavari. Ndizvozvo chaizvo zvinofanira kuva chechi nhasi. Zvino, tinoziva kuti ndicho chokwadi.

<sup>50</sup> Hakuna imwe nzira iri nani yekuti... Havana kumbobvira vawana nzira iri nani yekuti mucheche awane zvaanoda kunze kwekuzvichemera. Kana ukamupa bhero, woti, "Junior, une mazuva matatu chete okuberekwa, asi zvino kana wava kuda, kana wava kuda bhodhoro rako, simudza bhero iri woriridza," muone kana zvichishanda. Hazvishandi. Mwana mucheche anochemera zvaanoda. Ndiyo nzira yakapihwa naMwari. Ukawedzera kuchema... Usarove mwana mudiki, ari kutevedzera chete nzira yakapihwa naMwari. Anoda chimwe chinhu. Ndizvozvo chaizvo. Ndiyo nzira yoga yaanoziva yekudana amai vake; kuzvihambira, kuzvichemera. Ndizvozvo chaizvo.

<sup>51</sup> Mwari vanozvikurudzira kuvana vaVo. Mwari vanozvikurudzira kuvana vaVo vanotenda. Vakazviita. Kwete kutaura kwenjere, kwete imwe dzidzo huru yebhaibheri, dzidzo yebhaibheri yekudzidzisa. Vanoda kuti uchemere zvaunoda. Uye ndizvozvo chaizvo, zvichemere! Wakanyanya kuomarara nekudzikama, hauzviwani. Kana wagadzirira kuzvinyevenutsa zvishoma, uchichema, Mwari vanozvipa kwauri. Vanofarira kunzwa vana vaVo vachichema. Chemera zvaunoda kuna Mwari! Mwari vanozvida. Ndiyo nzira yaVo yavakapa. Zvichemere chaizvo! Ndiwo muchemero unoita mwana mucheche; ndiyo nzira yaVanoda kuti ucheme nayo.

"Kuchema kusvika riinhi?"

<sup>52</sup> Ko mwana mucheche anochemera kusvika riinhi? Kusvikira agutswa. Zvino ndiyo nzira inofanira kuitwa neMukristu mutendi, mwana waMwari. Kana ukaona kuti Mwari vakaita vimbiso, haikona kuirega, chema kusvikira yapindurwa. Chema kusvikira waona Mwari vachisimbisa Shoko raVo. Kana Mwari vasimbisa Shoko raVo, nekuratidza kuti riri pano, saka hauchafaniri kuzochema zvakare; wachiwana, chienda hako uchiMutenda nekuda kwacho. Usati wazviita izvozvo, chema

chaizvo kusvikira wazviwana. Ndinozvifarira izvi, kutsungirira, kubatirira.

<sup>53</sup> Kwete chirimwa chemasanganiswa, kwete icho chinofanirwa kubatwa sekacheche nekubhabhadzirwa, nekutakurwa kwese-kwese. Makristu zvinhu zvemazvirokwazvo, zvechokwadi, zvakaberekwa, zvaMwari. Vanorwira chinzvimbio chavo, uye vanorwa kusvika vapedza nezvepanyika ino. Nhano yoga-yoga kunongova kurwa.

<sup>54</sup> Mwari vakaudza Mosesi kuti Vakamupa nyika. Vakaudza Joshua kuti, “Nzvimbio yose tsoka, kana kuti pasi petsoka yako, pakunotsika, ipapo Ndakupa.” Vaitofanira kurwira inchi yoga-yoga yayo. Naizvozvovo tinorwira inchi yoga-yoga yayo. Hachisi chimwe chinhu chinbatwa sekacheche nekubhabhadzirwa, nekwese-kwese zvakadaro, zvobva zvanzi, “Saka, ndichakuendesa mhiri uko, woona izvo zvaunofunga pamusoro pazvo. Wopawo maonero ako.” Handiyo nzira yokuuya nayo.

<sup>55</sup> Huya nekutsunga. Huya zvekuti uchagara ipapo kusvikira zvapera. Gara ipapo kusvikira Mwari vapindura nekusimbisa. Munhu anotenda muna Mwari, anogona kuona Hupo hwaMwari, onzwa Hupo hwaMwari, kunzwa Hupo hwaMwari, nekuziva kuti Vari pano. Vari pano kupindura zvose zvaVakaita vimbiso zvemuzuva ranhasi. Saka, chichema kusvikira wachiwana! Batisisa paVari. Usabve, kunyangwe uchizofanira kugara masikati nehusiku. Mwari haVadi kuti vana vaVo vateerere pakutura kwenjere. Vanoda kuti vacheme chaizvo kwaZviri, kusvika vimbiso yasimbiswa.

<sup>56</sup> Abrahama pano aida chipiriso. Chii chakaitika? Mwari vakamupa gwayana. Ndiyo yaiva nzira yakapihwa naMwari. Aida chipiriso, saka Mwari vakachipa. Gare-gare, akadana nzvimbo iyoyo kuti *Jehovha-Jire*, “Ishe vachaZvipa chipiriso.”

<sup>57</sup> Zvino, Jobho, imwe nguva, muporofita wakare, Jobho. Aiva muporofita. Akapinda mudambudziko. Satani akashuvira kumuyedza, ndokumuitisa mamota. Uye akatora vana vake, akatora zvipfuwo zvake, akatora zvose zvaaiava nazvo, ndokumuitisa mamota.

<sup>58</sup> Zvino vanyaradzi vake vakauya, vakaitei? Hapana chavakapa kusara kwekunyomba, nekumuseka, vachimuudza kuti, “Nhai, wakatadza, muchivande.”

<sup>59</sup> Zvino Jobho akaramba akabatirira. Akadanidzira. Aiva nechokwadi chekuti aitevera mirairo yaMwari. Akange aita chaizvo izvo Mwari vakavimbisa kuita. Zvakavimbiswa naMwari kwaari, kuti Vaizomira naye, pasi pechipiriso chakapiswa, zvino akagarapo.

<sup>60</sup> Saka, Mwari vakamupa chiratidzo. Aiva muporofita. Chii chaakaona? Akaona Shoko, Jesu Kristu. Akati, “Ndinoziva kuti Mudzinkinuri wangu anorarama. Uye pamazuva

ekupedzisira, Achamira panyika. Kunyangwe makonye emunyama akaparadza mutumbi uno, asi zvakadaro munyama yangu ndichaona Mwari.” Maona, Vakapa chiratidzo cherumuko kwaari. Sezvo aiva muporofita, akaona Shoko. Akaona Shoko ndokuziva kuti mabhonzo aka nemutumbi wake zvaizomuka zvakare pazuva rekupedzisira. Akabvunzwa kana aiziva kwaiva naMwari, dai aikwanisa kuona chete.

<sup>61</sup> Akati, “Ruvu rinofa, rinomuka zvakare; muti unowa, unomuka zvakare; asi munhu anorara pasi oburitsa mweya wake, anoparara, ko aripi? Oo dai Maindivanza mubwiyo, mondichengeta munzvimbio yakavanda kusvikira hasha dzeNyudzapfuura.”

<sup>62</sup> Zvino mitinhiro yakatanga kuwomba, mheni ikatanga kupenya, Mweya waShe ukauya pamuporofita. Ndokubva asimuka, akaona Kuuya kwaShe, zvino akadanidzira, “Ndinoziva kuti Mudzikenuri wangu anorarama, zvino pamazuvu ekuguma Achamira panyika. Kunyangwe makonye emuganda akaparadza mutumbi uno, munyama yangu ndichaona Mwari.” Mwari vakapa Shoko, Jesu Kristu, zvino akaMuona akaMudana kuti Mudzikenuri wake.

<sup>63</sup> Israeri yaida nzira yekubuda muEjipita, zvino Mwari vakavapa muporofita, muporofita akasimbisa Shoko rakavimbisa kuna Abrahama. Chaiyo, nzira yakapihwa naMwari! Vaisakwanisa kudzidzisa muuto, vaisakwanisa kuita *izvi*, vaisakwanisa kuita *izvo*. Chinhu choga chavakaita kwaiva kumirira nzira yakapihwa naMwari. Uye Vakatura, vakati, “Vaizoburitsa vanhu ivavo kunze, mushure memakore mazana mana. Vanhu vake vaizova muhutapwa, asi Vaizovaburitsa neruoko rwakasimba. Vaizoratidza zviratidzo nezvishamiso zvaVo, vowana mbiri munyika iyoyo.”

<sup>64</sup> Heuno murume achiuya, pavakachema nokuchema! Uye zvino rangerirai, kuti kuchema kwose kwaisavadzikanura, kusvikira nguva yazadziswa.

<sup>65</sup> Zvinhu izvi zvatiri kuona nhasi, zvaisakwanisa kuitika makore makumi maviri akapfuura, kana makore makumi mana akapfuura. Ndinhasi wazviri kuitika. Ino ndiyo nguva yacho! Ndiyo nguva yacho! Ikozvino ndiyo nguva yazviri kuzadziswa. Sei? Mwari vakazvivimbisa, hezvinoi zviri pano.

<sup>66</sup> Vakati, makore zana apfuura, kuti, “Rubhabhatidzo rweMweya Mutsvene harwaizovapo zvakare.” Vakati, makore makumi mashanu akapfuura, “Mweya Mutsvene...” Asi imi vanhu maPentekosti makavaratidza, kuti yaiva nguva yaMwari yekudurura Mweya Mutsvene. Zvisinei kuti maMethodisti, maBaptisti, maPresbyteriani, maLutherani vaitaurei, makamira chaizvo neShoko raMwari. Varume vane hushingi vakabuda kunze uko vakaramba vakabatirira kusvikira rubhabhatidzo rweMweya Mutsvene rwauya, uye vakataura nendimi

nekusimudzira Mwari. Hakuna munhu anokwanisa kukuudzai zvakasiyana. Mwari ndivo mududziri waVo pachaVo; mazvibata. Unogona kutadza kuzvitsanangura, asi unoziwa kuti wazvibata. Ndiani angatsanangura Mwari? Hapana anogona.

<sup>67</sup> Handikwanisi kukuudzai kuti Mwari vanopa sei chiratidzo, asi ndinoziwa kuti zvinoitika. Handikwanisi kuona maitiro anoitwa zvinhu izvi naMwari. Harisi basa rangu rekuzvitsanangura. Ndivo, vanogara vega. Ndivo Elohim, Uyo akazvikwanira. Ndinongova muranda waVo. Ndinoziwa kuti Vakazvivimbisa, uye ndinoziwa kuti zviri pano. Ndicho chinhu chimwe chete chandinoziva. Ndinoziviza, kuti ndiVo mumwe chete zuro, nhasi, nekusingaperi. Ndinoziwa kuti Vakazvivimbisa izvi, uye Mwari vari pano kuita kuti vimbiso yaVo ive yechokwadi. Hongu. Nzira yakapihwa naMwari!

<sup>68</sup> Israeri yakapihwa muporofita, akasimbisa Shoko, vakaburitswa. Muporofita uyu, Mosesi, akararama makore akawanda murenje, makore makumi mana, achitambura nevanhu ava, achiedza kuvachengeta kusvikira akwanisa kuvasvitsa kunyika yechipikirwa. Zvakasvika panguva yekuti, murume aizofa; aiva nemakore zana nemakumi maviri ekuberekwa. Paisava nenzvimbo yekuti aizofira. Paakaswedera pedyo nerufu, Mwari vakamupa Dombo; Dombo raakamborova murenje, Dombo rakanga richivatevera, ravakanga vanwa mvura kubva mariri. Mwari vakamupa Dombo, nzvimbo yekufira, apo Mosesi aizofa rufu rwune chiremerera.

<sup>69</sup> PaDombo iri, Mwari, regai ndifire paDombo rimwe chete! Ndipo pandinoda kuva. Dombo iroro raiva Kristu Jesu. Hongu, changamire.

<sup>70</sup> Mushure mekunge afa, pamusoro peDombo iroro, aida vanomutakura. Mwari vakamutumira boka reNgirozi. Ko sei risiri boka revakuru vake? Nekuti hakuna munhu aigona kumuendesa kwaaiienda, kunze kweNgirozi. Dzakamutakura dzikamuisa muHupo hwaMwari, aida vatakuri uye Mwari vakavapa. Akaenda nenzira yakapihwa naMwari. Hareruya!

<sup>71</sup> Enoki akanga afamba makore mazana mashanu naMwari, uye akaVafadza. Aida mugwagwa mukuru wekuenda Kumusha nawo. Mwari vakaupa.

<sup>72</sup> Eria aive atuka Jezebheri pamusoro pechiso chake chakapendwa, nemuitiro wake waakakonzenza kuti vanhu vaite. Zvino akanga aneta uye nekurukutika, uye aive ava kuchigadzirira kuenda Kumusha. Aive akwegura zvakanyanya zvekuti aisakwanisa kufamba achiyambukira mhiri kweJorodhani; Mwari vakamupa nzira yekuti ayambuke Jorodhani. Aida kuenda kumusoro Kudenga, kunosangana naMwari; Mwari vakatumira ngoro yemoto zasi, nemabhiza, ndokumutakura kumusoro. Nzira yakapihwa naMwari. Nzira yakapihwa naMwari. Vanogara vachizviita nemo-nemo.

Ndizvozvo. Hongu, changamire. Mwari vanopa nzira, nguva dzose. Hongu.

<sup>73</sup> Varume vachenjeri, pavaiva parwendo rwavo vachibva kuBhabhironi, vaiona nzira yavaida kudzika nayo, nekuti vaiziva kuti Mambo uyu aizoberekwa. Vaida kambasi; Mwari vakapa Nyeredzi. Vakasiya zvime zvose kumashure. Vaisada makambasi; vakatevera Nyeredzi. Yaive nzira yakapihwa naMwari. Mwari vakapa nzira, vakatevera Nyeredzi kusvikira vawana Chiedza chakakwana. Oo!

<sup>74</sup> Nyika yaida Muponesi, rimwe zuva. Vakanga vakarasika; vakanga vasingazvizivi. Vaifunga kuti vakaponeswa, asi vaida Muponesi. Mwari vakapa Mwanakomana, seMuponesi. Sei? Hakuna umwe munhu waizvigona. Pakange pasina munhu panyika, kusina munhu Kudenga, chero kwese, aigona kuzviita. Mwari vakafukidzira mhandara, ikabata pamuviri ndokubereka Mwana-Murume. Zvino Mwana-Murume uyu akange asiri muJudha kana weMarudzi. Aiva Mwari, achiratidzwa munyama, Uyo oga aikwanisa kudzikinura. Ropa raKe rinotiponesa. Ropa raKe rinotipodza. Ndiro Ropa ratinogona kumira pariri, kune chero vimbiso yaAkaita. Mwari vakavimbisa kuzviita.

<sup>75</sup> Mwari vanosangana chete nemunamati kuburikidza neRopa, uye nepasi peRopa. Israeri yaiva nenzvimbo imwe chete yekusangana naMwari. Kwete mune...Mwari vane Nzvimbo imwe chete, nhasi, yaVa—Vanosangana nemunamati; kwete kuMethodisti, Baptisti, kana Pentekosti. Vanosangana navo pasi peRopa. Ndiyo nzvimbo yoga yakapihwa Mwari yavainayo; kwete musangano, kwete mune mubatanidzwa. Asi muRopa ndimo umo Jesu Kristu anosangana nemunamati waKe. “Kana Ndikaona Ropa!” Ndiyo nzira yakapihwa naMwari.

<sup>76</sup> Mushure mekunge chechi yagutsikana zvizere, pavakaMuona, kuti aive Iye Mesiya!

<sup>77</sup> Apo mudzimai mudiki patsime, aida Muponesi, aida chimwe chinhu chekuzoratidza. Akambova kuchechi nezvime zvose, uye vakange vaona chitendwa ichi nechitendwa icho, kusvikira, ashanduka kuva chipfeve. Zvakamuisa mumugwagwa. Rimwe zuva, aienda kunochera mugomo wemvura, panguva ingaita eleven o'clock masikati, hepano pakagara Murume; muJudha kumusoro ikoko, panzvimbo diki iyi. Zvino mudzimai akati...

<sup>78</sup> Paakaenda kunodzikisa mugomo wake uri pawindirasi, kuti achere mvura, akanzwa Murume achiti, “Mudzimai, Ndiunzirewo mvura yokunwa.” Zvino mudzimai akati...

<sup>79</sup> Akacheuka nekukurumidza, achingofunga kuti Aingova muJudhawo zvake, nekuti Aingova munhuwo hake kana zvichirevera pamutumbi. Aiva Munhu; anodya, anonwa, airara, sezvatinoita. Aiva munhu mune zvose zvekuti Aitokwanisa kufa, asi zvakadaro Aiva Mwari. Zvino tinozoona, kuti apo...

<sup>80</sup> Mudzimai akati “Hazvibviri patsika dzedu kuti imi maJudha mukumbire maSamaria zvinhu zvakaita saizvozvo.”

<sup>81</sup> Iye akati, “Asi dai waiziva kuti Ndiyani waunotaura naye, ungadai waNdikumbira mvura yokunwa.” Akati, “Enda unotora murume wako muuye pano.”

Akati, “Handina murume.”

<sup>82</sup> Akati, “Wataura chokwadi. Une vashanu, uye wauri kugara naye zvino haasi wako.” Chii chakaitika? Mwari vakapa chimwe chinhu kwaari.

<sup>83</sup> Mudzimai akati, “Changamire, Ndinoona kuti Muri muporofita. Tinoziva kuti kana Mesiya auya, Achatiudza zvinhu izvi. Ndizvo zvaAchaita. Shoko rinotaura kudaro. Tiri kuzvitarisira. Ndaneta chaizvo nezvinhu zvose izvi, zvitendwa nezvinhu zvavo, vaFarise, vaSadhuse, nevaHerodhi, chero zvazvingava. Asi tinoziva kuti Mesiya ari kuuya, paAnouya. Munoti kudii pamusoro pazvo?”

<sup>84</sup> Akati, “Ndini Iye.” Amen! Mwari vakanga vapa nzira. Mudzimai akasiya mugomo wemvura, ava mudzimai ashandurwa, akamhanyira muguta, akati, “Huyai, muone Murume Andiudza zvinhu zvandakaita. Handiye here Mesiya?”

<sup>85</sup> Petro, achiterera nyaya yaAndrea, zvino nguva dzakawanda ainge ateerera, ndokunzwa Andrea achitaura pamusoro paJohani achizivisa Mesiya, uye Murume, uye nezvinhu zvose izvi zvaiitika. Zvaiva zvose chakavanzika kuna Petro. Asi rimwe zuva akaya naAndrea, kuzoona Jesu. Zvino paakapinda muHupo hwaJesu, Jesu akamutarisa, zvino Akati, “Zita rako ndiSimoni, uye uri mwanakomana wajonasi.” Mwari vakanga vapa nzira kuna Petro kuti aone kuti Aive Ani. Ndiye aiva Mesiya wacho.

<sup>86</sup> Zvino tinoona kuti, mushure mekunge Jesu afa, nekukwira Kudenga, Chechi yaida Simba, rekupupura. Mwari vakavapa Pentekosti. Vakapa Pentekosti.

<sup>87</sup> Makore zviuru zviviri apfuura, shamwari. Makore zviuru zviviri apfuura. Mumazuva ano ekupedzisira, tasvika pekuti, munhu akapinda zvakanyanya muhurongwa hweChikristu uye akaHutsveyamisa zvakare, kuHusanganisa kuve zvitendwa, machechi, masangano, nekutaura kwenjere, kusvikira Simba nechinhu chechokwadi cheVhangeri raKristu zvatonyatsorasika zvachose. Uye tiri pano neShoko rakavimbisa remazuva ano ekupedzisira, richaitika, richatora nzvimbo; munhu haaRitendi. Vakabva paRiri. Unovabvunza kana vari Mukristu; vanoti, “Ndiri wekwakati-kwakati.” Hazvimborevi kana chinhu chimwe chete. Unofanira kuva Mukristu nekuberekwa. Zvino tapinza zvinhu zvose muBhabhironi zvakare, mushure mezviuru zviviri zvemakore.

<sup>88</sup> Chechi nhasi inoda Simba neChokwadi, zvakare. Oo! Mwari vamutsa Mwanakomana waVo, kuti izvi zvizogadziriswa, nekuti Akati, "Chinguva chiduku nyika haichazoNdioni zvakare; asi imi muchaNdiona, nekuti Ndichava nemi, kunyangwe mamuri." Tinoona, muna VaHebheru 13:8, "Ndiye mumwe chete zuro, nhasi, nekusingaperi."

<sup>89</sup> Tinoona, muna Maraki 4, kuti Vakativimbisa Mharidzo mumazuva ekupedzisira, yaizo "dzorererda Kutenda kwevanhu kuchidzokera kumadzbaba zvakare." Vakazvivimbisa, mumazuva ekupedzisira.

<sup>90</sup> Vakavimbisa zvakare, muna Johani 14:12, "Uyo anotenda maNDiri, mabasa aNDinoita anoaitawo zvakare. Kunyangwe anopfuura aya, kana makuru kudarika aya, anoaitawo, nekuti NDinoenda kuna Baba vaNgu."

<sup>91</sup> Aitaura nerimwe zuva. Vakati, "Tenzi, tiratidzei chiratidzo."

<sup>92</sup> Akati, "Chizvarwa chehutera uye chehupombwe chinotsvaga chiratidzo." Ndicho chizvarwa chatiri kurarama machiri nhasi. Akati, "Zvino Ndichavapa chiratidzo. SaJona aive ari mudumbu rehove huru, kwamazuva matatu nehusiku hutatu, naizvozvo Mwanakomana wemunhu achave mumoyo wenyika, kwamazuva matatu nehusiku hutatu."

<sup>93</sup> Imhandoi yechiratidzo chingatsvagwa nechizvarwa chakaipa uye chehupombwe? Chiratidzo cherumuko. Zvino ndicho chatinovimbisa nhasi, chiratidzo cherumuko chekuti Achiri kurarama, Ndiye mumwe chete zuro, nhasi, nokusingaperi.

<sup>94</sup> Akati, "Sezvazvaiva mumazuva aRoti," sekupfuura kwatakaita nemazviri husiku hwapfuura. "Mazuva aRoti, chii chakaitika mumazuva aRoti, ndizvo zvazvichava pakuyua kweMwanakomana wemunhu." Zvinhu izvi takazvivimbisa, nemamwe Magwaro akawanda. Kuti tisarambe tichipedza nguva... "Chinguva chiduku nyika haichazoNdioni zvakare. Kosmos, 'hurongwa, zera rechechi,' havachazoNdioni zvakare. Asi imi muchaNdiona, nekuti Ndichava nemi, kunyangwe mamuri, kusvikira kumagumo ezera." "Jesu Kristu mumwe chete zuro, nhasi, nokusingaperi." Chii ichocco? Chiratidzo chakapihwa naMwari, nzira yakapihwa naMwari.

<sup>95</sup> Abrahama akamirira mwanakomana. Chiratidzo chekupedzisira chaakaona kuparadzwa kweveMarudzi kusati kwauya, aiva Mwari vachiratidzwu munyama yemunhu, vakaziva zvakavanzika zvemoyo waSara paaiva mutende. Jesu akati, "Zvichadzoka zvakare panguva yekuuya kweMwanakomana wemunhu." Hama, hanzvadzi, ndinotenda kuti tiri kurarama muzuva iroro. Ndinotenda kuti rino ndiro zuva revimbiso.

<sup>96</sup> Unofanira kuva nekutenda mune zvauri kuita. Kana usina kutenda, kana uri kungozvitora uchifungidzira... Shoko rekuti

*kufungidzira*, maererano naWebster, zvinoreva kuti, “kungoita usina mvumo.” Asi kana Shoko razvivimbisa, uye Mwari vomira seri kweShoko iroro, hauchafungidziri zvachose. Uri kuita chaizvo izvo Mwari vakati uite, uye Vanosungirwa kuZvitsigira.

<sup>97</sup> Mu—mumutsiridzi, mukuru, ane mukurumbira, makore mazhinji akapfuura, ndakamuona pandaiva mukomana mudiki, aiva Paul Rader. Akataura imwe nyaya, rimwe zuva, yandakazogara ndinayo. Akati, “Rimwe zuva, taitema miti.” Aiva munhu anoita basa rekutema miti, kumusoro uko muOregon, akati mukuru wake wepabasa akamuudza kuti aende kumusoro kwechikomo. Airota. Kwaaiava chaiko, panguva iyoyo, aive zasi kuzvitsuwa; ndokubatira fivhiri, achipisa zvakanyanya, zvino akange ave kufa. Vakanotsvaga chiremba, asi aiva kure mamaera nemamaera, neigwa.

<sup>98</sup> Chiremba asati asvika ikoko, Paul akatanga kuperezeka, achiwedzera kurwara nekurwara. Akabva adana mudzimai wake akatendeka. Akati, “Mudiwa, mave kusviba mukamuri ino, kusviba kwakawedzera, kuchiswedera.” Zvino akapinda mukoma.

<sup>99</sup> Zvino paakadaro, anoti akarota, paaiva mukoma iyi, mukuru wake wepabasa akamutuma kumusoro kunotema mumwe muti. Akawana muti wacho, ndokudonhedza muti wacho, ndokunyudza demo rake mauri, akakotama kuti ausimudze. Haana kukwanisa kuusimudza. Akati simba rake rakanga rapera. Aisakwanisa kuusimudza. Akati, “Nemakuriro emuti uyu, chokwadi ndinogona kuusimudza. Regai ndiedze zvakare.” Zvino akagwadama ndokusimudza, akashingirira kusvika aneta. Akagara parutivi rwemuti, akati, “Handitozivi kuti ndichaita sei. Mukuru anoda muti uyu zasi uko kumusasa, zvino ndaper a simba zvakanyanya kuti ndiuendese zasi.”

<sup>100</sup> Ndokuti akanzwa Izwi raitapirisa raati akambonzwa, aiva mukuru wake aitaura; asi anoti, paakacheuka kuti aone aiva mukuru wake, aiva Ishe Jesu. Akati, “Paul, uri kurwisana neiko zvakadaro? Ko uri kushungurudzika zvakadaro nei? Uri kuona here mvura iri kuyerera apo?” Akati, “Ko wadii wangokanda danda murwizi, woritasva uchidzika naro zasi? Ritasve kusvika kumusasa.”

<sup>101</sup> Akasvetukira padanda akatanga kudzika zasi ari pamusoro petwumasaisai, achidanidzira neizwi rake riri pamusoro-soro. “Ndakatasva pariri! Ndakatasva pariri!”

<sup>102</sup> Hama, hanzvadzi, Jesu Kristu vakavimbisa zvinhu izvi kuti zvichaitika mumazuva ekupedzisira. Ndinotenda kuti tiri kurarama pano. Ndinotenda kuti Ndiye mumwe chete zuro, nhasi, nekusingaperi. Handizivi kuti zvakaitika sei, asi ndakatasva paRiri. Ndinotenda kuti Ndicho Chokwadi, nekuti Ndiyo Evhangeri, Nzira yakapihwa naMwari. Ndinotenda kuti

Ndiyo Mharidzo yenguva, nguva yatiri kurarama mairi. Ndiyo nzira yakapiwa naMwari. Ndakatasva paIri!

Haungasvetukirewo here nenii, tichikotamisa misoro yedu?

<sup>103</sup> Baba veKudenga, takatasva tichienda muKubwinya tiri paShoko reNyu. Tinotenda kuti Shoko reNyu iZvokwadi. Oo Mwari, dai wese murume nemudzimai, husiku huno, akwira achipinda muShoko, uye vorangarira, pavanenge vachifamba vachidzika havo nemurwendo, vanozogona kupupura, “Ndakatasva pavimbiso yaMwari. Ichandiendesa chaimo muKubwinya. Ndiyo nzira yakapiwa naMwari kuitira ini nhasi. ‘Jesu Kristu mumwe chete zuro, nhasi, nekusingaperi.’”

<sup>104</sup> Makati, “Chinguva chiduku nyika haichazoNdioni zvakare, asi imi muchaNdiona; nekuti Ndichave nemii, kunyangwe mamuri.” Makativimbisa, Ishe, kuti tichaKuonai.

<sup>105</sup> MaGiriki akauya, neimwe nguva, vakati, “Madzichangamire, tinoda kuona Jesu.” Zvino vakapihwa mukana iwoyo. Uye husiku huno, Ishe, tinoda kuKuonaiwo, zvakare. Ndicho chishuwo chemoyo yedu. Hakuna munhu anonزوا nezveNyu, zvokutoti anotoda kuKuonai. Zvino kana maGiriki aya akatenderwa kuKuonai, uye Makatipa nzira yekuKuonai, Munogara muchigadzira nzira nekuti Muri mumwe chete zuro, nhasi, nekusingaperi. Muranda akaunza maGiriki aya muHupo hweNyu, uye vakakwanisa kuKuonai. Titenderei mukana mumwe chete husiku huno, Baba. Dai isu, sevaranda, taunza ungano iyi muHupo hweNyu. Uye ngationei Jesu, husiku huno, Anova mumwe chete zuro, nhasi, nekusingaperi. Zviitei, Ishe.

<sup>106</sup> Ponesai vakarasika, Ishe, kana paine murume, mudzimai, mukomana, kana musikana. Patinoona nyika yedu yakanyanya kusvibiswa nemhondi uye nemabhinnya, nevakatsveyama, uye nekuona huori huri munyika nhasi! Uye tichiona huori mumachechi, uye nekuona achinongedzera kune kuurayiwa nemubatanidzwa wemachechi uko, nekuti havasi kuenda nenzira yakapihwa naMwari! Vari kuenda nenzira yechimwewo chitendwa pachinzvimbo chekuuya neShoko.

<sup>107</sup> Mwari, tinonamata kuti Makristu chaiwo, echokwadi, vakaberekwa, sekuzviratidza kwandaita, nekuva madhadha chaiwo, ivo... “Makwai aNgu anonزوا Izwi raNgu, mutorwa haangateveri.” Ishe, Izwi reNyu ndiro Shoko. Ndiro rakagara riri nzira yeNyu yakapihwa kuChechi uye nekuvanhu, ndiro Shoko reNyu. “Shoko reNyu iZvokwadi.” Uye Muri Shoko. Zvino Bhaibheri rinoitiudza, “Shoko raMwari rinopinza kudarika munondo unocheka nekwose, rinonzvera mifungo nezvinangwa zvemoyo.”

<sup>108</sup> Ko sei Israeri isina kuona Mesiya wayo, pavakaona kuti Aiva Shoko iroro, paAikwanisa kunzvera mifungo yaiva mumoyo mavo? Sei vasina? Vakazvinzwisisa kuburikidza nevaporofita,

kuti vaporofita vaikwanisa; asi huzaro hwaMwari pahwakaitwa muMwanakomana waVo, uye Akagara pakati pedu, ipapo vakatadza kuzviona nekuti vakanga vakapofomadzwa.

<sup>109</sup> Ishe, avo vane maziso avo akavhurika, husiku huno, ngationei Jesu pakati pedu. Dai munhu wose anorwara apodzwa. Ngazvigadzirise izvozvo, Ishe, kuti havachatombofi, zvachose, kubva panguva ino... asi kuti vagotenda kuti Muri Mesiya. Vari kuuya nenzira yaMwari. Vazhinji vavo vari pano, husiku huno, vari kufa. Pane vazhinji vari pano, husiku huno, vanogona kunge vasisipo pano vhiki rinotevera kubva nhasi, kana Imi, rubatsiro rweNyu rwukasauya.

<sup>110</sup> Zvino, Baba, Mune mungava chete pane zvaMakavimbisa. Asi Makavimbisa kuti tinozoKuonai. Makavimbisa kuti zvaMakaita tinozviitawo zvakare. Ino ndiyo nguva yacho. Ndazvipupura; ndinozvitenda. Ndakakunzwai Muchitura kudaro; Shoko reNyu rinotaura kudaro. Munorisimbisa. Ndinoziva kuti ichokwadi. Zvino ngazvizivikanwe, Ishe. Zvakanoyrwa, zvino ngazviitwe, nekuda kweHumambo hwaMwari. Ameni.

<sup>111</sup> Handitendi kuti tichadanira mutsara wekunamatira. Ndinotenda kuti ndichangozvishandisa ndiri pano chaipo.

<sup>112</sup> Vangani venyu vari kurwara? Zvino munga... Makasimudza ruoko rwenyu, muchipupura kuti munorwara.

<sup>113</sup> Vangani venyu vanopupura zvimwe chete, "Hama Branham, handina kuponeswa zvemazvirokwazvo"? Mungasimudza ruoko rwenyu here, "Ndinamatireiwo"? Mwari vakuropafadze iwe, iwe. Zvakanaka izvozvo. Izvozvo... Mwari vakuropafadzei. "Handina kuponeswa."

<sup>114</sup> Zvino, imi masimudza maoko enyu, nemi vasina, "Asi, Hama Branham, zvechokwadi ndinoda kuponeswa. Moyo wangu. Ndinotenda kuti hakuna chimwe chasarira chero munhu munyika." Ndechipi chimwe, chii chaungabudirire pachiri, chingava chikuru kupfuura ruponeso rwako? "Ndinamatireiwo. Ndinoda kuponeswa." Ungasimudza here ruoko rwako, kwese hako muchivakwa chino, chero kupi, "Ndinoda...?"

<sup>115</sup> Vangani venyu vasati vagamuchira Mweya Mutsvene, vanoti, "Ndinoziva ndinofanira kuUgamuchira"? Simudzai maoko enyu. "Handisati; uye ndinoda." Zvakanaka, pane vakati kuti vasina.

<sup>116</sup> Zvino, Kristu anochengeta Shoko raKe, uye unofanira kuchengeta kutenda kwako maAri. Ndiye Shoko. Zvino, VaHebheru chitsauko 4, yakataura kuti, "Shoko raMwari," ranova Kristu. Kristu iShoko. Munozviziva mese? Itai "ameni." [Ungano inoti, "Ameni."—Mupepeti] Ndiye Shoko, "mumwe chete zuro, nhasi, nekusingaperi." ZvaAiva muna Mosesi, Aivawo zvakare muna Eria; zvaAiva muna Eria, ndizvo zvaAiva muna Johani; zvaAiva muna Johani, Akazvizadzisa pachaKe

muna—muna Jesu. Zvino nhasi Ndiye mumwe chete sezvaAiva kareko, uye Richiri Shoko raMwari rakaporofitirwa zuva rino, rinoMuita Chiedza chinovhenekera pamwe nekusimbisa Shoko rakavimbiswa.

<sup>117</sup> Tasvika munguva yekupedzisira, shamwari. Jesu ari pano. Ndinoziva makazvinzwa.

<sup>118</sup> Ko toti hauna kubvira wakamboona, muhupenyu hwako, uye usina kumbova nepfungwa yekuona, pasina munhu akambodaro, asi pano neapo unombonzwa manzwiro chaiwo anodziya? Zvino ini ndiine maziso, ndichigona kuona, zvino ndokuudza kuti izuva. Woti, “Handizivi kuti zvinoitika sei, asi ndinoita manzwiro, anoita sekudziya, aunotonzwa.”

Ndoti, “Izuva.”

“Ko zuva chii?”

“Chiedza.”

“Ko chiedza chii?” Inenge iri nyika itsva kwauri.

<sup>119</sup> Asi ko ndikakuudza kuti Jesu Kristu vanga vakamira pano izvozvi? Ko ndikakuudza kuti Vari pakati pedu? Vakazvivimbisa. “Panoungana vaviri kana vatatu muZita raNgu, ipapo Ndiri pakati pavo. Ndipo paNdiri!” Zvino chinogona kuva Chokwadi, kwandiri, *Ichi iChokwadi* chose, kana kuti Hachisi Chokwadi zvachose. *Ichi chinogona* kuva Chokwadi, kana kuti hachisi chokwadi.

<sup>120</sup> Zvino, iri nyaya yekukuponesa, Akazviita izvozvo paAkafa paKarivhari. Kukupodza, Akazviita izvozvo paAkafa paKarivhari. Munozvitenda here izvozvo. Shoko rakati Akazviita.

<sup>121</sup> Zvino chinhu chimwe chete chaAngaite, dai Ainge akamira pano aine—aine sutu ino akaipfeka, iyo yaAkandipa, kwaizongove kuratidza kwauri kuti Aiva Mesiya.

<sup>122</sup> Kwete nemavanga ezvipikiri mumaoko aKe. Chero munyengeri upi hake anogona kuzviita, kuisa mavanga ezvipikiri, neropa kumeso kwake kwese, nemavanga nezvinhu. Izvozvo zvinogona kuitwa. Zvakamboitika. Vanhu vakawanda vakatorovererwa saYe. Handizvo izvozvo.

<sup>123</sup> Asi Hupenyu hwaKe, hwaiva huri maAri! “Mwanakomana haana chaanogona kuita, pachaKe, kunze kwezvaAnoona Baba vachiita.” NdeHupenyu huri maAri, hwakaratidza. Kwete nekuti Aiva muJudha zvakaita kuti mudzimai mudiki wepatsime aMutende saMesiya; nekuti Aigona kunzvera mifungo yaive mumoyo make, zvakamboitika. Kana yaiva iri iyo nzira Mesiya akaZvizivisa nayo mumazuva akapfuura, yakanga iri nzira yaKe yakapihwa yekuZvizivisa nayo. Ndiyo nzira yaKe yakapihwa, maererano neGwaro, rezera rino. Munozvitenda here? [Ungano inoti, “Ameni.”—Mupepeti]

<sup>124</sup> Zvino, mumwe nemumwe wenyu pano, ndiri mutorwa. Ndatarisatarisa, handioni munhu wandinoziva. Munhu wese pano, asingandizivi, uye anoziva kuti handina chandinoziva pamusoro pako, simudza maoko ako. Kutekeshera, kwese. Munhu uyu akarara panhowo apo, asimudza ruoko rwake. Haandizive. Hapana anondiziva.

<sup>125</sup> Asi rangerirai, Mwari vanokuziva. Mwari vanokuziva. Zvino, kana Vakaratidza kuti vari pano.

“Ko chii ichocco, Hama Branham?” Chipo.

<sup>126</sup> Chipo chii? Chipo chii, zvino? Kwete kutora chimwe chinhu woshandisa chimwe chinhu, woti, “Ndine chipo chekupodza! Ndinobuda kunze kunopodza *uyu*, ndopodza *uyo*.” Dai ndaigona, ndaitozviita. Zvino, asi, chipo, uye uri—uri... Unodudzira chipo zvisizvo. *Chipo* kungo “zvibvisa pachako munzira woregera Mweya Mutsvene uchikushandisa.” Maona? Ndicho chipo.

<sup>127</sup> Ndizvo zviri mushumiri. Haaparidzi zvaanoda kuparidza. Anongozvibvisa munzira, ndicho chipo, zvino kufemera kunouya, uye a—anotaura kuburikidza nekufemera kweMweya Mutsvene. Chero chimwe chipo chipi zvacho ndiyo nzira yachiri. Zvino, zvipo zvekushumira, nezvime zvakadaro, zvakange zvakadaro. Pane, kutanga, kuzvipo zvakapihwa naMwari, zvinoti, “kutanga vaapostora, vaporofita, vadzidzisi, vafudzi, nevavhangeri.” Ndiwo mahofisi acho. Ndizvo zvipo zvedu.

<sup>128</sup> Zvino, Jesu Kristu akavimbisa kuti Achazviita mumazuva ekupedzisira. Kana Azviita, kana Akazvivimbisa izvozvo obva azviita, vangani vachatenda nekuMugamuchira, husiku huno? Simudza ruoko rwako, uti, “NdinoMugamuchira.” Vangani vari muno zvino... Maita henyu. Vangani vari muno vasina kumbobvira vakauya kune mumwe wemisangano kumashure, simudzai maoko enyu. Ini zvangu, vangada kusvika hafu yeungano. Vangani vanotenda, kuti vasati Vazviita, munongotenda zvakadaro? Mwari vakuropafadzei.

<sup>129</sup> Zvino tarisai. Kana ndakuudzai Chokwadi, Mwari vanosungirwa kundipindura. Vachazviita. Vanoisa Mashoko aVo mumuromo mako uye Anobva aitika. Ndizvozvo, Mashoko aKe, Anofanira kuzviita. “Ndatuma Shoko raNgu, Haridzoki risina charinacho.”

<sup>130</sup> Zvino, dai ndaipodza, ndaizviita. Semuremekedzwa, mushakabvu, Hama Upshaw vatanga tiri kutaura pamusoro pavo. Murume mutana iyeye aive akagara kumashure muhwiricheya iyoyo, murume mutana mhare, ndingadai ndakavapodza dai ndaigona. Ndakatanga kubva papuratifomu, chaizvozvo, ndakacheuka ndokuvaona muchiratidzo, vachienda, vachifamba. Ndakavadana, ndikavaudza zvazvaiva, uye ndizvo zvazvaive. Vakasimuka vakafamba, ndokuuya papuratifomu, vakabata zviginwe zvavo zvekutsoka, mushure

mekunge vari mhetamakumbo kwemakore makumi matanhatu namatanhatu. Maona?

<sup>131</sup> Husiku humwe chete, mudzimai wechitema, aiva nemucheche wake, zasi ikoko kurutivi. Ndakati, “Ndiri kuona chi—chiremba vakapfeka magirazi, uye—uye vakaita oparesheni kumusikana mudiki, wechitema, zvino zvakamuomesa mutezo kubva pahuro.”

<sup>132</sup> Mudzimai wechitema mukuru, waisakwanisa kumudzivisa kuuya papuratifomu. Akati, “Ishe, tsitsi, mwana wangu!” Zvino heunoi achiuya, boka remaasha harina kugona kumubata.

<sup>133</sup> Ndakati, “Tete, hazvina zvazvinobatsira kuuya kumusoro kuno. Hazvisi... NdiMwari.” Ndakati, “Hazvina zvazvinobatsira kuuya kuno. Ingotendai.” Zvino vakapfugama nemabvi avo vakatanga kunamata. Ndakatarisa pamusoro peungano ndikaona mukoto, ungati, uchienda. Ndakaona musikana mudiki wechitema aine chidhoru mumaoko ake, achienda nemumukuto. Zvino ndakatarisa, musikana mudiki wechitema, ndakatarisa kumashure, ndikaona kuti aiva mumwe chete. Ndakati, “Wapindurwa.” Hoyo akasimuka, ndokubva abva panhowo. Maona?

<sup>134</sup> NdiMwari. Maona? NdiMwari. Maona? Havakwanisi... Hapana anokwanisa kupodza. Kutenda kwako muna Mwari.

<sup>135</sup> Zvino, Bhaibheri rakati, izvo, “Ndiye muPrisita Mukuru, iko zvino, anogona kubatikana nemanzwiro ehutera hwedu.” Munozvitenda here? [Ungano inoti, “Ameni.”—Mupepeti] Muprisita Mukuru! Zvino, kana Ari Muprisita Mukuru, Aizoita sei? Kana Ari mumwe chete zuro, nhasi, nekusingaperi, Anozoita zvime chete zuro, nhasi, nekusingaperi.

<sup>136</sup> Zvino namatai, uye mutendere Mweya Mutsvene zvino... Imi munoti kuna Mwari, “Mwari, murume uyu akamira apo haandizive, asi zvaAnotaura zvine musoro. Muri mumwe chete. Muri Kristu. Ndiri kurwara. Ndiri kuda. Kana Mukanditendera kuti... Kana ndisina kutenda kwekuzviita, tenderai mumwe munhu wandinoziva awane kutenda, uye kuitei kuti... Imi danai uye regai—regai—regai ini kana munhu iyeye abate mukomberro weHanzu yeNyu muKubwinya. Ipapo kana murume iyeye azvibvisa munzira, zvino Mochishandisa muromo wake kutaura kwandiri, uye chingozviitai nenzira imwe chete yaMakaita paMaive panyika. Ndichaziva kuti Muri mumwe chete zuro, nhasi, nekusingaperi.”

Ngatikotamisei misoro yedu zvino.

<sup>137</sup> Ishe Jesu, tichishanduka kubva mukuvhangera tichienda kubasa rechiporofita, asi zvakadaro ndinoKutendai, Ishe, Makazvivimbisa. Uye ndinonamata kuti Muzviite, husiku huno. Zviitei. Ndinzweiwo. Kana ungano ino yabva pano, husiku huno, uye toenda kumba, dai tikataura seavo vaibva kuEmausi, “Moyo yedu haina kutsva here matiri paAnga achitaura nesu

munzira?" Jesu akamutswa kubva kuvafi; havana kuzviziva. Vaitaura naYe; havana kuzviziva. Asi paAkava navo mumba, uye avhara musuwo, zvino Akaita chimwe chinhu nenzira yaAkazviita Asati arovererwa. Izvozvo zvakavhura meso avo. Vakaona kuti aive Iye. Zvakare, Ishe, moyo yedu ngaitsve patinodzokera kumba husiku huno, sezvakaita yavo. Nekuti tinoziva kuti Mataura kwatiri munzira. Itai zvinhu, husiku huno, zvaMakaita paMaiva panyika, nekuti Muri mumwe chete zuro, nanhasi, nekusingaperi. Takumbira nemuZita raJesu. Ameni.

<sup>138</sup> Zvino ivai mumunamato uye ingotendai. Ngatitsvenesei divi rino, kutanga. Zvisinei nepaungava uri, muchivakwa, tenda Mwari. Ndinoshvira kuti munhu wese anyatsoremekedza uye ogara akanyarara, namatai.

<sup>139</sup> Izvi hazvigoneke zvachose. Ndanga ndichitaura mangwanani ano, pakudya kwemangwanani kwevashumiri, "nenji." *Nenji* rinokatyamadza, "chimwe chinhu chinokatyamadza, asi chiri chechokwadi." Munoziva kuti Mweya Mutsvene unomira pano wotaura chimwe chinhu muungano iyoyo, kuvanhu vandisingazine, chinofanira kuva chiri nenji. Chimwe chinhu chisingatsanangurike. Handizivi kuti Vachaita here. Ndiri kungotarisira kuti Vanozviita, kuvimba kuti Vanozviita.

<sup>140</sup> Zvino chingonamata, uti, "Ishe Jesu, ndinoda kubata hanzu yeNy, uye ndi—ndine chishuwo. NdinoKuvimbisai, Ishe, ndicha—ndichaKushumirai hupenyu hwangu hwose." Mwari vanoda kuti utendeuke. Kana usina kutendeuka; tendeuka, iti, "Ndinoda kutendeuka, Ishe. Ndinoda kuti Mundipodze. Ndinoda kuti Mundirofadze. Ndipodzeiwo zvino Ishe. Ndiri muranda weNy."

<sup>141</sup> Ndanga ndiri...Nhasi mapa here makadhi ekunamatirwa? Ndanga ndichazobvunza Billy kana...Kana akasazviita, ndaizodana mutsara wekunamatirwa. Asi havana kupa makadhi ekunamatirwa nhasi. Ingogarai mukuremekedza, tendai.

<sup>142</sup> Zvino, Muzita raJesu Kristu, ndinotora mweya wese pano pasi pesimba rangu, kuitira kubwinya kwaMwari, kuti Shoko raVo rizivikanwe, kuti paZuva reKutongwa hatizowani pembedzo.

<sup>143</sup> Zvino tarisai kuno, uye mutende zvino. Namatai nemoyo wenyu wose, uye ingonamatai, mukuzvininipisa. MusaZvirwisa. Chingozororai henyu, muti, "Ishe, Makaita vimbiso. NdinoKutendai." Ndizvo zvandinofanira kuita.

<sup>144</sup> Ndinoziva kuti handina chikonzero chekukubvunzai. Vangani vakamboona Chiedza chiya? Regai tione. Makaona mufananidzo waCho. Ngationei maoko enyu, vakamboona mufananidzo waCho. Hamusi kuChiona here apo chaipo? Munoonaa, ndechimwe chiero. Chiri pamusoro pemudzimai uyo.

<sup>145</sup> Ari kurwara nedambudziko remakumbo nemusana. Iye... Munotenda here kuti Mwari vanogona kukupodzai, hanzvadzi? Chii chamabata? Hamundizive, asi mabata Chimwe chinhu. Kana Ishe Jesu vakandiudza kuti muri ani, zvinokuitai here kuti mutende zviri nani? Munonzi Mai Phillips. Kana zviri izvo, mirai netsoka dzenyu. Zvakanaka. Ndiri mutorwa zvachose kwamuri here? Simudzai ruwoko rwenyu kana zviri izvo. Handisati ndakambovaona muhupenyu hwangu. Chii chavabata? Endai munotaura nemudzimai wacho, pamberi apo. Marwadzo aenda ose zvino. Maita zvakanaka. Munogona kuenda kumba uye monoita zvakanaka.

<sup>146</sup> Heuno mudzimai, ari kumashure kwemudzimai apo. Ari kutambudzika nekuhutahuta kwakanyanya. O Mwari, kana akarega... Zita rake ndiMai Star. Tendai, Jesu Kristu anakupodzai. Simukai netsoka dzenyu mugamuchire kupodzwa kwenyu. Kana ndiri mutorwa kwamuri, vheyesai maoko enyu. Kuhutahuta kwenyu kwakanyanya kwapera. Jesu Kristu akupodzai.

<sup>147</sup> Chii chaAkavimbisa? Akazvivimbisa. Munotenda here? [Ungano inoti, "Ameni."—Mupepeti]

<sup>148</sup> Pane mudzimai ari kumashure kwavo, akagara apo. Ari kunamata. Ari kuhutahuta, ane zvakavhiringika. Anoda kusiya kuputa. Zita rake ndiMai Bordon. Simukai, Mai Bordon. Fodya dzenyu dzapera. Jesu Kristu akupodzai. Handisati ndamboona mudzimai uyu muhupenyu hwangu.

<sup>149</sup> Munotenda here? Zvino munoziva kuti handigone kuita izvozvo. NdiJesu Kristu. Chii ichoch? "Shoko ibenyo, rine simba, kupfuura munondo unochecka nekwose, rinonzvera mifungo nezvinangwa zvemoyo." IShoko, Jesu Kristu mumwe chete zuro, nhasi, nekusingaperi. Hamugone here kutenda izvozvo?

<sup>150</sup> Pano, heuno murume akagara neche kuno uku, ane buri mudumbu, chirwere chemoyo. Ndizvozvo. Handizive murume wacho. Handisati ndakambomuona. Asi mushumiri. Mufundisi, VaKinsey. Ndizvozvo chaizvo. Munotenda here, changamire? Simukai netsoka dzenyu mugamuchire kupodzwa kwenyu. Jesu Kristu akupodzai.

<sup>151</sup> Gara zviya, munganditirewo here chimwe chinhu, zvamuri mushumiri? Isai maoko enyu pamusoro pemudzimai wenyu, ari kurwara nedambudziko reitsvo, nedambudziko rechiropa, nokuva mufemu zvakanyanya, nezvakavhiringika. Isai maoko enyu pamusoro pavo. Zviri kuzovasiya, kana mukatenda.

<sup>152</sup> Nhai, pane murume akagara kumashure kwenyu chaiko, akaputirwa nemumvuri werufu. Ane kenza. Murume anotambudzika nebundu, kenza, kuhutahuta. Zita rake ndiVaYoung. Tendai zvino. Jesu Kristu vanokupodzai.

Munozvitenda here? Munozvigamuchira here? Zvakanakai, changamire.

<sup>153</sup> Hepano parere murume, arere pano panhowo iyi. Changamire, handikuzivei. Dai ndaigona kukupodzai, ndaizviita. Ndiri mutorwa kwamuri. Mauya nenzira yose iyi. Matoshingaira kuti muuye pano. Hamukwanisi kuvanza zvisina kumira zvakanaka nemi; asi handigoni kukupodzai. Mauya pano nemudzimai wenyu. Ndivo avo vakagara apo vakapfeka bhachi reruvara rwepichi. Ndizvozvo. Zvakanaka. Murume akaputirwa nemumvuri werufu; haakwanisi kurarama asi nguva pfupi zvino. Ane kenza.

<sup>154</sup> Muri kutambudzika, zvakare, hanzvadzi. Munotenda here kuti Mwari vanogona kundiudza zvamuri kutambudzika nazvo? Idambudziko remusana wenyu. Ndizvozvo chaizvo. Kana zviri izvo, simukai. Zvakanaka, imi gamuchirai kupodzwa kwenyu. Zvitendei. Isai ruoko rwenyu pamurume wenyu.

<sup>155</sup> Munonditenda here kuva muporofita waVo, changamire? Mukarara ipapo, munofa zvechokwadi. Hamusi kukwanisa kuzorarama. Ndizvo zvoga. Vanachiremba vakutadzirirai. Kenza yakudyai. Ndakaona zvinhano zvikuru kupfuura imi zvakapodzwa. Handikwanisi kukupodzai. Asi kana mukangozvigamuchira nekuzvitenda! Munozvitenda here? Ndiwo mukana wenyu woga. Nguva dzenyu dzekugumisira dziri kupfuura. Munozvitenda here? Kana muchitenda, simukai kubva panhowo iyoyo. Simukai kubva ipapo, nemuZita rajeSku Kristu! Simukai netsoka dzenyu mupore, uye mugofamba muchibuda muno, muchirumbidza Mwari. Umwe munhu ngaavabatsire ipapo, vabatsirei. Hevanoi avo, vasimuka netsoka dzavo.

<sup>156</sup> Vangani vari muno vanotenda? [Ungano inofara ichiti, “Ameni.”—Mupepeti] Simudzai maoko enyu. Simukai netsoka dzenyu. Vamwe venyu mese vanoda kupodzwa, simukai, nemuZita rajeSku Kristu. Simudzai maoko enyu, rumbidzai Mwari. ChiVapai rumbidzo nembir. Zvino tendai Ishe nekupodzwa kwenyu, Jesu Kristu mumwe chete zuro, nhasi, nekusingaperi!

<sup>157</sup> Hama, vanachiremba vazvitadza. Iyi ndiyo nzira yakapihwa naMwari. Itendei!

<sup>158</sup> Vangani vanoda kugamuchira nzira yakapihwa naMwari? Simudzai maoko enyu uye ipai Mwari kurumbidzwa, mumwe nemumwe wenyu, uye mutende kuti mapodzwa, muZita rajeSku Kristu. Ameni.



*NZIRA YAKAPIHWA NAMWARI YEZUVA RINO* SHO64-0206E  
(God's Provided Way For This Day)

Mharidzo iyi neHama William Marrion Branham, yakaparidzwa kwokutanga neChirungu China manheru, Kukadzi 6, 1964, paKern County Fairgrounds muBakersfield, California, U.S.A., yakazotorwa kubva patepi yakarhekodwa ndokuzodhindhwu muChirungu pasina chakamurwa. Kuturikirwa uku muchiShona kwakazodhindhwu nokugoverwa neve Voice Of God Recordings.

SHONA

©2021 VGR, ALL RIGHTS RESERVED

VOICE OF GOD RECORDINGS, ZIMBABWE OFFICE  
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Chiziviso chekodzero

Kodzero dzose dzakachengetedzwa. Bhuku iri rinokwanisa kudhindhwapi papirinda yekumba kuti ushandise uri iwe pachako kana kugovera kunze, usingatengesi, semudziyo wekuparatzira Evhangeri yaJesu Kristu. Bhuku iri harigoni kutengeswa, kudhindhwapi akawanda, kuiswa pawebhusaiti, kana kuwana mumuchina waringachengeterwa, kuturikirwa mune mimwe mitauro, kana kushandiswa kukumbira mari pasina mvumo yakanyorwa nevekuVoice Of God Recordings®.

Kuwana umwe umboo kana zvimbewo zviripo zvingawanikwa, tapota nyorerai:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)